

庭
立
記
聞

學士梁先生父執也諫菴又與余同受知於前學使錢文敏公相契舊矣諫菴閉室嗜書謝絕人事而余宦游四方三十餘年始歸衡下整理故業與諫菴晨夕過從互以所著反覆質難恨砥礪之晚也已已重九小集清白堂諸郎出草冊示余且乞爲名之展讀終卷皆記乃翁攷古荅問之語及撰造所未刻者因題曰庭立記聞諫菴子四長學昌字蛾子次耆字萊子次衆字成子早卒次田字力子闔闔之間自爲師友朝經暮史樂以忘榮豈尋常高門世胄比耶閱三歲仲季先後出宦惟蛾子秀才侍親家居請余刊定此編附梓清白士集後固雅志也學士今年九十夫人九十有一康彊純嘏遠近欽仰諫菴年六十九長余二歲他日諫菴更以聞於學士者詔子姪濡筆記之余尚能少助參校焉嘉慶壬申五月望日諸以敦藹堂序

庭立記聞卷一

男梁學昌輯

翁著史記志疑及清白士集六種梓行之後續有更加不能刊
改隨筆識於刻本上方恐歷久失遺謹摘次之其已見瞥記
中者不載

史記志疑

自序或問署名於字之下何義翁曰經史中或字在名下或名在
字下元無一定然左傳僖三十二年疏襄十年疏竝云古人
言名字者皆先字後名而連言之遂依其例

夏紀周禮秋官司厲鄭司農注引尚書曰予則奴戮汝與漢書
王莽傳引甘誓拏作奴仝

帝錢竹汀詹事云世卽泄也非字脫

殷紀大戴禮諸志篇天子卒葬曰帝

周紀后稷名棄之故翁雖據蘇明允譬妃論而心尚有疑後閱

常熟陶正靖父元晚聞存棄詩說一則云生民詩履帝武敏

毛鄭異解蘇明允譏鄭之失而予由仍從鄭諸儒亦曲附之
則以稷見棄之故未明也明允以爲疑而棄之夫首子易生
人情所樂何反致疑棄援鄭莊之寤生爲比豈足以紂鄭哉
稷之致棄經固明言之諸儒特未察爾經曰先生如達注但
云易生而不知其所以易凡嬰兒在母腹有胞衣裹之臨蓐
時其衣先破兒體少舒手足漸欲動搖故生之難羊子之生
胞仍完具墮地而後母爲破之故其生易稷生如達蓋藏於
胞中形體未露是以無啼聲及轉徙數處烏去而呱至此始
離於胞在旣生數日之後也然則疑而棄之乃人之常情所

謂居然生子者政疑怪之辭故下章遂言棄置之事仍識其啼聲不惟著收養之由而前之致棄益明已

銅人吳偉業綏寇紀略崇禎九年曲阜孔廟聖像兩目流淚如悲淚汗三日夜十五年十一月黃梅孔隴鎮地藏菩薩目出淚一縷循鼻而下拭而復出十二月城陷

秦紀正有征音老子天得一以清地得一以寧侯王得一以爲天下正始皇生年史於始皇略其在位之年而書其生年曰五十一年而崩其實五十歲耳錢竹汀有一說云五當爲立秦王政二十六年始稱皇帝至三十七年崩爲帝十一年也

始皇紀注謂狹中在餘杭翁引毛西河說以爲赭龕二山之間狹中非餘杭也後又采宋陳鵠耆舊續聞云餘杭非江流所經狹中卽今富陽縣絕江而東取紫霄宮路江流至此極狹水波

委蛇始皇從此渡取盩陽界至會稽山盩陽有始皇祠諸大令藹堂云赭龕二山之口潮汐出入如何可渡若以富陽爲狹中則在省城西南九十里古今道里不全似史言西百二十里近是志疑從西北之說恐非

呂后紀

張衡西京賦視往昔之遺館獲林光于秦餘亦作林字

孝文紀

諸藹堂云中大夫令勉爲車騎將軍中大夫令是官號

勉其名荀紀作李勉必有所據大顏小顏以爲姓令索隱引風俗通云令尹子文之後皆非也志疑誤從之

天官書

錢竹汀云鉞星在南北河之間故曰河鉞漢志作戌今

本作戌誤此戒字亦戌之譌唐一行誤讀史漢創爲山河兩戒之說索隱正義仍之故多用戒字

魯世家

祭統衛莊公稱孔悝叔舅其實莊公乃悝之舅而悝則

甥也謂之舅者亦以稱異姓之臣耳可與左傳齊王舅也一

語參看

宋世家

以親戚稱父母者又得數條大戴禮文王官人篇逸周

書官人解伐名以事其親戚管子九變云大者親戚墳墓之所在墨子節葬下篇列子湯問篇炎人之國其親戚死朽其肉而棄之儀渠之國其親戚死聚柴焚之荀子榮辱篇親戚不免乎刑戮

晉世家

龍蛇之歌高誘注淮南說山又與諸處所述異

孔子世家

太平廣記詠諸類引談藪北齊使來聘梁訪東海徐

陵春秋答曰小如來五歲大孔子三年謂七十五也亦誤以

孔子年七十二

孟子傳

樓攻媿行彭龜年兼侍講制云惟孟軻所著七篇之書

非戰國以來餘子所及亦謂孟子之書自作

酈吏傳 寰宇記四十九郅都葬雁門墓側古柏五千餘株號郅

君柏

自序傳引 歸安嚴九能云代王償債乃楚金引漢書宣元六王
說文繫傳 傳淮南憲王欽爲張博償債二百萬事誤記爲史記耳又代
王當作王代

金史蕭貢傳貢注史記一百卷當補

人表攷

上上 神農稱曰神子見春秋元命苞

軒轅 李燾通鑑長編大中祥符五年十月軒轅降神稱趙始祖上
尊號曰聖祖上靈高道九天司命保生天尊天帝詔聖祖名
上曰元下曰朗不得斥犯內外文字不得斥用黃帝名號其

經典舊文不可避者闕之

帝稱曰伊唐又見魏志高堂隆傳亦曰唐勗見青浦王侍郎昶

金石萃編唐員半千撰尹尊師碑

帝亦曰商履見大戴禮少間篇金樓子湯有七號一姓生二履長三肱肚四天成五天乙六地甲

文王亦曰周昌見大戴少間

武王稱曰武發見南齊書魏虜傳孝文帝弔比干文

年十四海寧錢廣伯云志疑於魯世家據路史所引竹書作武王

年五十四人表攷全以禮記言九十三及今本竹書九十四

爲非又據劉氏外紀引應劭謂周公年九十九而疑之案文

王十五生武王則文王九十七終時武王已八十三矣周公

當亦八十餘是武王九十三周公九十九信也武年五十四

恐不可從

周亦曰王子旦見賈子脩政語下字朝明見金石萃編唐開元二年偃師縣周公祠碑又毛詩狼跋傳公孫成王也幽公之孫孫毓非之矣鄭箋周公孫遁也劉敞七經小傳則云公孫者幽公之孫謂周公也不從毛鄭而義較長可存其說補一稱焉

仲尼稱曰孔宣亦見白居易詩栖栖者孔宣

上中女媧北齊書祖珽傳太姬雖云婦人實是雄傑女媧已來無有也語在唐前

臺駘晉天福六年封昌寧公見顧亭林金石文字記晉祠銘一條未檢所出

祝融淮南天文訓其佐朱明注舊說云祝融蓋亦火正官名
大音泰獨通典引盧氏禮記解詁云美大故號之讀大如字

可備一說

散宜生 金石萃編有殷散氏銅盤銘蓋散氏散宜氏二氏也殷季

散氏或宜生之先世歟

晉太子 唐武后號爲昇仙太子見舊唐書禮儀志及廟碑蜀王衍

尊爲聖祖玉宸皇帝見十國春秋

孟子 字子與亦見左傳序疏又子上稱爲孟孺子見孔叢

如蘭相 隸釋費鳳別碑稱蘭相又東坡和陶雜詩天方斲漢室豈

計一鄧慮昆蟲政相齧迺比蘭相如自注去聲

上下 說文巾部帚字注少康杜康也葬長垣

孔儀禮士冠禮注作孔甫

百里 史記索隱秦紀述贊稱里奚

漆影 元和蔡鐵耕雲云此彫字或有意直書使名字不相混與

他處忘諱者不全

季廣韻注孔子門人有公休哀公所哀所必析之譌或又譌作休而爲三人歟

采桑羽 蔡鐵耕云以羽爲女之譌甚是案楚辭東方朔七諫路室

女之方桑兮孔子過之以自侍此又一采桑女也或以孔子

故列在第三歟若衝波傳述孔子遇采桑女事則誕而俚矣

子服子 錢竹汀云攷以爲子服同子案藝文志雜家有子晚子三

十五篇齊人好議兵與司馬法相似晚服聲相近或卽其人

又魯繆公臣有子服厲伯見論衡非韓篇

柳泄 孟子外書明人僞託其文說篇萬章問曰子庚何人也曰古

之高人也劉攽注子庚泄柳字不知何據又唐石經泄作世

廉 葬肥陵見寰宇記淮南道引古今冢墓記

王稱曰翦公見金石萃編唐王文幹墓誌銘

中上微仲蔡鐵耕云表兩微仲當是一弟一子不必疑此為誤

士八海鹽崔星洲應樞號秋云周禮地官山澤之虞皆有中士四

人下士八人國語紀其官曰虞魯論紀其位曰士也八士或

本氏尹而居南宮遂別為南宮氏如東門襄仲桐門右師之

比

霍叔蔡鐵耕云本書霍光傳贊以子孟為叔之苗裔故推而進

之蓋惑於褚少孫三代世表後之妄說也

唐叔晉天福六年封興安王見顧亭林金石文字記晉祠銘下

穆王亦曰姬滿見文選雪賦

伯蔡鐵耕云博古錄彰銘作伯冏父可補一稱又劉敞公是集

伯冏彰贊序云周公裔孫不知何據案伯冏父彰外見鼎銘

者一見卣銘者一見彝銘者七俱單罔連文然則伯罔卽內
外傳單氏之先乎姓纂成王封少子臻於單伯罔當穆王時
爲王族單氏可信也

申生新序節士晉獻太子不拜蛇祥自殺豈申生乎與左傳異
術乞五行志術亦作遂又詩報我不述韓詩作不術

趙盾亦作遁見金石萃編開元七年修孔子廟碑

范文亦曰范燮見晉書王坦之傳

苗賁亦稱苗子見韓子外儲說左下

杞繁二人竝稱殖華見淮南精神訓

琴論語鄭注亦稱子牢

王孫蔡鐵耕云攷引說苑權謀篇王孫商疑商爲賈字之譌而

反質篇又載衛叔孫文子問王孫夏事夏賈古通借爾雅釋
文榎舍

人本或本全卜子之名商字夏而夏又借作賈歟王孫夏御覽五百三

十一作王孫賈

大夫史伍子胥傳正義引高誘云楚之郢人又得一證足知今種

本呂注之譌

番君蔡錫昌鐵耕子云此卽吳芮當置四等之末傳寫誤在前也芮

爲秦番陽令甚得江湖間民心號曰番君入漢爲長沙王一年薨則芮本六國時人故列於表而仍其始號明非爲佐漢有功忠著甲令也若謂漢臣不當入表則孔褒爲孝惠博士遷長沙太守表固存之矣

耳如錢竹汀十駕齋養新錄卷十五載唐開元時茹守福墓誌云

君京兆人蓋周之遺苗鄭之遠裔也昔六國分峙茹姬爲魏后之妃七雄竝爭茹耳爲韓王之相茹如乃一字左傳成十

年鄭有公子班字子如鄭公族多以王父字爲氏故如出於鄭

樂正孟子外書孝經篇云樂正子春年九十矣使其孫克學於

孟子恐不足信

又言公都子名或亦無據

蒙文選北征賦稱蒙公

中齊桓公元和志謂墓在臨淄鼎足山本於括地志見史記管晏

列傳正義

許夫列女傳以夫人爲衛懿公之女與左傳異

單襄子三國志和洽傳稱單襄

中包胥亦稱申包見晉書孫惠傳庾信擬詠懷詩又唐書文藝傳

崔信明云申胥海隅釣師能固其節崔秋谷云此當指伍胥所稱釣師或因漁丈人之事而附會之

郵亡亦曰孫郵見魏志陳思王植傳

榮聲稱曰榮期亦見晉書皇甫謐傳庾信和張侍中述懷詩及

讚

陳司敗釋文引鄭以爲司敗人名齊大夫

孫藝文志道家孫子十六篇當卽其人

章子蔡鐵耕云匡章非孟子弟子畢氏刻呂覽載尊校辨高注之

妄矣此不當采

被蔡鐵耕云此必吳被離字近而譌與子桑子牽連混寫在後

也

軋子錢竹汀云二人疑卽治春秋之夾氏鄒氏也音皆相近

宋客有自澧州安福縣來者見宋氏家牒言玉字子淵號鹿谿

子未知何本

葉陽諸藹堂云以趙策諒毅之言觀之葉陽當是公子慄史秦

紀志疑及此攷以爲華陽君芊戎似未的

中下蔡仲能改行率德乃降於霍叔二等何耶

晉文侯仇書疏鄭讀義爲儀儀仇皆訓匹也故名仇字儀與孔傳異
儀古音俄與和疊韻和其餘聲也又晉世家集解馬融引王
順曰父能以義和我諸侯亦見釋文恐不可從

潘和蔡鐵耕云此疑楚卞和也獻玉被刖事閱三君諸書所說不

全而韓子和氏以爲厲武文淮南覽冥注史鄒陽傳注皆以

爲武文成表列文王時或其人歟卞弁古通俱有槃音與潘

音近且楚有潘族和或系出於潘乎堯典於變時雍漢書成

碑作於弁亦可證

于何蔡鐵耕云向戌之祖廣韻注作向父盱表或單稱盱而脫其

半干又譌爲于也諸藹堂云通志略向父名肸廣韻譌肝

張儀前蜀王建封儀昌化王見吳任臣十國春秋

下上其王魯語周恭王能庇昭穆之闕而爲恭何反下穆王三等

陳釐公釐之曾祖諡孝公何以名孝

靈王錢竹汀云泄卽世也禮雜記泄柳唐石經作世柳夏帝泄

左疏引世紀作世蓋泄从世聲亦可讀如世而春秋三傳世大多通如樂大心作世心可證故泄心又作大心諸藹堂云

古世太亦通故太子稱世子太叔稱世叔

楚惠王鐘鼎款識曾侯鐘銘云唯王五十有六祀楚王韻章薛尚

功以爲惠王則可補韻章之名

下中朱廣韻房字注丹朱子陵以父封爲氏周語韋注曰狸姓丹

朱之後

象括地志名爲鼻亭神當引

莒子莒嬴姓字亦作盈見地理志城陽國縣莒注

庚與下下司徒皮蔡鐵耕云釋文本或作潘韓詩作繁而師古引詩

作蕃皆異文七人官氏俱依詩此表元文必無太字

長秋僑如蔡鐵耕云此獲在魯文時耳其人既壽不嫌列於莊公之

世

鄭諸藹堂云南后鄭袖是二人故楚策懷王謂張儀曰吾固以

爲天下莫若是兩人也攷誤作一人

呂子校補

高誘曾南豐戰國策目錄序言此書有高誘注者二十一篇或

云三十二篇

重己烏獲蔡鐵耕云史秦紀志疑人表攷五等及此篇竝據文子以

爲古有兩鳥獲案柳宗元謂文子多竊取他書陳直齋亦謂
自班固時已疑其依託似未足據

當染寅素中行寅染於黃蘗秦高彊墨子無黃字宜衍注中荀子當
作荀文子中行寅卽荀寅亦稱中行文子也

尊師索盧參范書獨行傳有索盧放章懷注索盧姓也

音初蔡鐵耕云佚女猶言處子不當作淫泆解吳縣陸萊仲云
見有娥之佚女已見楚騷注佚美也又作美字解

季秋紀月令宋史張慮傳亦云月令之書出於呂不韋

審己越王授諸藹堂云授卽前貴生篇之王子搜亦卽句踐五世孫

王翳也畢氏校本於貴生據三世弑君之說疑爲無顓究屬
臆斷當從審己校語爲是

當務立封宋書元凶劭傳前代以來未有人君卽位後皇后生太子

唯殷帝乙既踐阼正妃生紂前校失檢宋書故以帝乙立紂為疑

務本公功大戴禮記禮察篇處此之功無私如天地漢書功作公本味歸藏易云空桑之蒼蒼八極之既張可證其為地名古樂篇云顓頊處空桑則其地古矣

約衆肉之美者旄象之約高注約飾也一曰美也畢氏輯校引楚

辭招魂九約王逸注約屈也疑屈為屈之譌諸藹堂云屈即屈短尾與說文訓無尾全淮南原道注屈讀秋

雞無尾屈之屈畢校以說文無字為衍亦非而象尾不聞

與牛尾竝稱珍美明謝肇淛五雜俎云象體具百獸之肉惟

鼻是其本肉以為炙肥脆甘美約即鼻也此說似勝然則旄

亦以鼻為美乎

慎大戴旄甲兵蔡鐵耕云車甲衅而藏之府庫見樂記是經傳言及

甲也

辛穆晉語趙襄子使新穉穆子伐翟韋注晉大夫新穉狗也此

注辛穆子有譌脫

江河之大四語列子說符載襄子此語呂襲列子也

昭王審應魏昭王襄王之子高注不誤史記誤分襄王哀王爲二王

也畢氏校本反據史改襄爲哀謬矣

罷不路管子短語十四天下乃路左傳昭元年以露其體注羸也

韓子亡徵云罷露百姓風俗通第九大用羸露蓋三字古通

乾谿高義諸藹堂云此指楚靈王自縊乾谿也注乃云靈王作乾谿

之臺百姓愁怨不引左氏而引公羊非作書之意

劒貴信抽自承諸藹堂云釋上下文乃莊公自劫也與他書言曹子劫

桓公異梁仲子校云曹劒以劒自向非

舉難甫
戚歌

蔡鐵耕云列女傳甯戚商歌曰浩浩乎白水蓋歌白水

之詩浩浩白水條條者魚

管子作育
育者魚

其歌未畢故管仲待靖

語始解或是詩當管仲時已缺佚耶

求人

諸藹堂云北至人正之國注作今正攷淮南時則訓令正

之谷御覽引作令止並引注云令止丁令北海胡地尚書大

傳政作丁令則人今二字皆令之譌脫正與止未詳

任地

蔡鐵耕云陽大陰小詳易泰卦孟冬稱大猶爾雅十月爲

陽純陰用事嫌於無陽而名之

元號略

嘉慶四年正月尊崇

世宗憲皇帝諡號毅字下加睿聖二字尊崇

高宗法天隆運至誠先覺體元立極敷文奮武孝慈神聖純皇

帝陵曰裕陵

乾隆六十年禪嘉慶四年正月上昇聖壽八十九元號略刊於乾隆癸丑不及恭錄

敬紀於此

唐睿宗初名旭輪後去旭字景雲下失載

宋度宗先賜字邦壽咸淳下失載

葉隆禮契丹國志蘇天爵三史質疑謂其說得於傳聞失實甚多當不誣也卽如遼景宗小字明展志云諱明記興宗字夷不堇志云番名木不孤渤海高永昌僭號隆基志云改元應順蕭幹僭號天復志云改元天興皆與諸書不合

遼史同高保一名翰僭號天復東都事略蕭幹奚人蕃名夔离不僭元天嗣遼史幹作幹字文懋昭大金國志亦云蕭幹名夔離不略中仍紀元諸書兩載諸藹堂參考以爲一人足訂向來之誤蓋繙繹多通借無定字故名不全耳至其僭號當

依遼史天復爲是東都事略之天嗣契丹國志之天興沈德符正閏考云一作天阜皆所傳異辭不可信也

西遼德宗大石諸家編年書俱言在位十二年錢竹汀辨之甚詳其略云西遼世次紀年惟見於遼史天祚帝紀末他書皆無之自當以遼史爲據紀云大石以甲辰歲自立改元延慶卽宋宣和六年在位二十年殂則宋紹興十三年癸亥也史稱大石建號萬里之外雖寡母弱子更繼迭承幾九十年以大石在位廿年加二后二主年數感天后七夷列十三承天恰八十八年然則延慶當有十年并康國十年乃合在位廿年之數惟史於延慶三年建都之後卽云改延慶爲康國元年又云康國十年歿似大石止十二年諸家大率因此致誤又史於直魯古之亡不言其年何干支諸家皆系以辛酉詹

事引元史及長春真人西游記聖武親征記謂直魯古爲乃

蠻屈出律所滅當在辛未而非辛酉

辛未爲宋寧宗嘉定四年元太祖六年

編

年者旣滅大石之年則直魯古之亡不得不移前數年矣且

大石西奔在天祚保大三年癸卯七月大石旣自立爲王必

不承保大之號次年甲辰二月改元延慶固其宜也旣而兵

行萬里跋涉艱勤至起兒漫百官冊立爲帝距甲辰改元之

時已久改元在前稱帝在後史以改元稱帝爲一事非其實

矣大石頗通今古其稱帝蓋在延慶三年用漢昭烈晉元帝

故事俟天祚凶問至而後百官勸進耳若建都改元康國必

在延慶十一年西游記所謂移徙十餘年方至此地者也

明袁黃紀年類編云法天啓運聖武元太祖鐵木眞六字年號

此是謚號誤以爲年號耳若以爲年號則太定憲三宗何以

無元號乎

安南陳日煒昌符之號見越史略及錢竹汀金石文跋尾續不獨翁氏粵東金石略有之也安南昭光寺鐘康熙十三年合浦海濱浮出好事者移置廉州府學云

安南黎維禱紀元景興以乾隆辛巳立丙午卒陸萊仲云景興錢流傳甚夥其幕文有庚申辛酉壬戌三種非維禱在位時干支疑先有景興仍而不改也

陸萊仲云補遺以贊普鍾爲三字年號近得南詔碑稱贊普鍾十四年更是一證

錢竹汀金石文跋尾載元泰定五年贈寧海州知州王慶墓表云父生于擴慶庚申歿于至元癸酉壽七十四妣生于擴慶丙辰歿于至元庚寅壽九十五擴慶之號他所未見案丙辰

庚申乃宋寧宗慶元二年六年也擴寧宗諱也王姓者以宋人入元而妄更爲擴慶狂悖甚矣

誌銘廣例

集古錄劉熊碑光武皇帝之元省去孫字顧亭林金石文字記熹平四年豫州從事尹宙碑東平相之元會稽太守之曾省去兩孫字碑版中所僅見後讀顏魯公集其撰杭州錢唐縣丞殷府君夫人碑云君北齊黃門侍郎之推府君之元皇朝秦王記室思魯府君之曾蓋用漢碑例也夫人爲魯公之姑碑中稱君不稱夫人婦人稱君亦創見曾向竹汀先生言之載入金石文跋尾續

瞥記

記一福州陳恭甫太史云

名壽

李長林東晉江夏太守其時梅

頤本尚書已行豈有兩孔傳竝出而諸儒無一言及之者泰誓疏特言李於偽泰誓篇每引孔安國亦非謂全書皆然但安國恐未必作傳又豈得專爲泰誓三篇解注長林所舉不足信蓋出於依託耳錢詹事潛研堂答問亦誤信安國嘗爲大誓作傳史記教釋子集解鄭曰國子也其下案尚書作胄子六字乃裴駟語又其下孔安國曰四字則駟引偽傳胄長也之釋而今本脫之又其下釋胄聲相近五字亦駟語蓋證明史與書之異文若以此五字爲眞孔傳則安國先馬遷卒何緣援史以證書且舜典一篇亡失孔傳乃取王范之注以補之安得有安國語耶至駟引墟疏也今禹貢傳無此文汲古閣本乃於墳墟傳下誤題疏字而實無正義一字反羈以陸氏釋文墟音盧說文黑剛土也九字分注其下誤題作傳譌跡已極攷通典田制

述禹貢兼載偽孔傳於下土墳墟注云高者壤下者墟墟疏也上六字見偽傳下三字文相連屬而與集解所引合又見陳祥道禮書亦引作孔傳是傳本有此文今本漏之矣

酒齊語令夫工羣萃而州處審其四時辨其功苦韋注功牢也苦脆也苦沽音義相近

冥崔秋谷云臨江府西有蕭墓傳爲梁武帝過此一女死鑄金爲壻而葬焉是其遺址

月鄭注引今月令疑漢時月歷錢竹汀謂卽漢志明堂陰陽說文所引明堂月令也似不甚確

嘗祭此條馬貴與已發之當刪

記二妻甥諸藹堂云秦晉世爲婚姻非我之自出皆不以甥舅爲嫌

文嬴辰嬴未定是申生姊所生也不當與楚成全案惟晉文

以懷公之妻爲妾未免賈倫

閏月陸青來撫軍

名燿

文集閏月考本錫山顧氏謂古者隨時置閏

應閏之月卽是歸餘之終非十二月乃爲終也閏三月爲非
禮言推術之失魯歷不正或失之前或失之後故譏之恐亦
非確解秦漢之稱後九月非歸終乎又攷宋寧宗嘉定十四
年閏十二月晉永和六年宋慶歷八年乾道九年明景泰元
年崇禎十三年我朝順治十六年己亥皆閏正月張蒼水
有己亥閏元宵詩

晉悼
元年諸葛堂云晉用夏正悼公於文十八年二月卽位三月卽
踰年矣非以厲公末年爲元也

魯夫人

諸葛堂云春秋於魯夫人皆不書薨惟君母則書昭夫人

薨卒非哀公母也定姒卒於定十五年先君未葬子未成君

故變莖言卒此春秋之創例也

鄭注海寧陳仲魚鱸輯孝經鄭注其序云鄭六藝論敘孝經云又爲之注江左中興久立博士穆帝集講孝經云以鄭爲主荀茂祖集解因之蓋鄭注孝經未寫定其孫小同追錄成之故不入鄭志目錄范書所紀原其始也

太宰吳魯會盟子貢贊焉鄭以爲吳太宰亦自有因閭微君據檀弓陳太宰而曰集註或吳或宋不當遺或陳二字似可不必杞梁妻崔秋谷云杞梁妻無名孟姜乃秦時范氏之妻哭於長城者傳譌合爲一人一事耳宋周煇北轅錄雍正縣范郎廟其地名孟莊廟塑孟姜女亦是一證

話訓此格當託始於孔子之易象傳朱子注詩輟轉反側句亦用韻蓋做景純也

釋文中間引顏師古定本則元朗書成之後亦有增加也
舜二皇甫謐世紀作三妃不可信而晉書謚傳篤終論仍作二

妃與世紀異

記三厲年諸葛堂云周厲王在位不得有三十七年齊世家胡公於
夷王時被弑其子獻公僅九年至武公十年共和行政衛世
家頃侯賂夷王始命爲侯立十二年卒其子釐侯十三年其
和行政以此二條證之厲安得三十七年乎

田完秦穆公有子四十人孟嘗君父靖郭君有子四十人

告子翁於人表攷謂告子非孟子弟子錢廣伯駁之載其語於管

記仍答簡云葉紹翁四朝聞見錄云考亭之門人劉黻著脫

正錄謂告子孟子之高弟陸象山門人名不記氏彭曰告子不

是孟子弟子故獨稱子亦是與孟子全時著書之人某以爲

非弟子本此樂正子稱子惟善信章一見蓋孟子答諸弟子
無不稱子未有如孔門之名呼者顧寧人謂世變使然

董論
災異

仲舒論遼東高廟災通考詳言之當刪

米賤愧郊錄載溫公曰太平興國時米一斗十餘錢又熙寧八年

呂惠卿曰臣等有田在蘇州一貫錢典得一畝田歲收米四
五六斗然常有拖欠僅如兩歲一收上田得米三斗斗五十

錢亦可謂賤矣若貴之極者范史董卓傳穀石數萬魏志卓
傳穀一

斛至數
十萬催汜之亂長安穀一斛五十萬豆麥二十萬唐尉遲

樞南楚新聞荆南孫儒之亂斗米四十千唐書黃巢之亂京

師米斗三十千宋史杜範傳升粟一千其增未已理宗明史

李樞傳永寧宣撫奢崇明反攻貴陽官廩告竭米升直二十

金郡卒屠人市肆斤易銀一兩左慈第傳崇禎十四年疏言

臣自靜海抵臨清米石銀二十四兩去冬山東米石二十兩
河南乃至百五十兩流賊傳崇禎十三年河南大旱斛穀萬
錢

緯班書李尋傳有五經六緯語范史張衡傳言圖緯成哀後始
聞惠棟後漢書補注張衡傳注云綠圖幡薄見呂覽亡秦者
胡亦綠圖中語似起戰國至哀平而大興以亡秦者胡爲綠
圖中語據淮南人間訓也

石刻經發端雖始議於蔡邕而其得蒙詔許實宦者汝陽李巡
之功見呂強傳當表出之

子夏春秋屬商見穀梁疏引孝經說公穀皆受經子夏

漁陽容齋隨筆已辨之當刪

本生稱晉出帝父敬儒及卽位追封宋王稱皇伯宋史李昉傳
伯叔

昉上言臣叔父超叔母謝氏是臣本生父母宋孝宗母秀王夫人張氏其薨也史書曰伯母見孝宗紀乾道三年又儒林黃震傳時皇叔大父福王與芮判紹興府至若濮王之議司馬溫公及王珪皆謂宜稱皇伯彭思永疏云濮王於屬爲伯祭告之辭則曰姪嗣皇帝書名昭告於皇伯父此萬世之法也傅堯俞云設濮王尚無恙陛下得以父名之乎皇考之稱於人情禮文皆大謬戾

張飛字

呂布傳注引英雄記周瑜傳注引吳錄亦皆作益德然以字配名似翼字於義爲近

友侍

梁書良吏孫謙傳彭城劉融疾篤無所歸友人輿送謙舍謙開廳事待之及死以禮殯葬宋史杜紘傳紘宦京師時里人馬隨調選病臥逆旅紘載與歸甄城醫視之隨竟死爲治喪第

中或以爲嫌不自恤厲鶚城東雜記云明末虞宗政字大赤宗瑤字仲鵠虞長孺司勳子竝有才名入復社仁和馮侗社中知名士也貧而不遇無子病危時屬家人巾車至二虞家爲之親治醫藥晝夜不懈及卒二虞中堂門署喪屏庭設司鼓大赤仲鵠跪拜謝弔客披上古友朋喪服前輩交誼之篤如此

記四五

官並用張鷟朝野僉載云元嘉

唐高祖子韓王

少聰俊左手畫員右手

畫方口誦經史目數羣羊兼成四十字詩一時而就足書五言一絕六事齊舉代號神仙童子新唐書王伾傳陳諫嘗覽染署歲簿悉能言其尺寸所治一閱籍終身不忘南唐近事史虛白嘗對客弈旁令學徒四五輩各秉紙筆先定題目隨口而書略不停綴數食之頃衆製皆就

沙門授官唐代宗時胡僧不空官至特進大鴻臚開府儀同三司

國公歿贈司空宋時僧官有授光祿鴻臚卿少卿者遼時憫

忠寺題名僧官有授崇祿大夫守司徒及檢校太師行鴻臚

卿者元仁宗延祐六年特授僧從吉祥榮祿大夫大司空加

大司徒僧文吉祥開府儀同三司吉祥僧之美號順帝以西天僧爲

司徒明太祖以鍾山僧吳印爲山東布政使見方正學集他

若元劉秉忠明姚廣孝乃僧之還俗者又無論矣唐高宗以

天水尹尊師文操爲宗聖觀主授銀青光祿大夫行太常少

卿固辭乃受散官睿宗拜葉法善鴻臚卿封越國公贈其父

慧明歙州刺史元宗拜道士馮道力銀青光祿大夫鴻臚卿

冀國公拜其父太元朝散大夫使持節沁州諸軍事沁州刺

史拜尹愔諫議大夫集賢院學士兼修國史以道士服視事

又相州刺史韋濟薦張果入宮制以爲銀青光祿大夫賜號

通元先生縑黃之流輒玷清班何其濫也唐敬宗以道士劉從政爲光祿少卿

妒謝肇淛五雜組云太祖於常開平妻蒞醢其肉以賜羣臣

唐尊老子南史何昌寓傳一客姓閔以爲子騫後昌寓掩口曰遙遙

華胄明史呂坤傳王守仁王錦襲二人萬歷時衛官蓋世神奸籍隔

數千里而冒認王弼子孫

以孫爲子晉書石季龍勒之從子勒父朱幼而子季龍故或稱勒弟

宋史周美傳子早卒以孫永清爲子又孫永傳永十歲而孤

祖給事中沖列爲子行沖卒喪除復列爲孫

婦人顏魯公撰李光弼碑母韓國太夫人乃燕國公武楷之女

史以爲李氏則仝姓矣蓋史之誤又朱酒保妻亦見宋史五

行志應山女見明史儒林潘府傳長春真人西游記回紇婦

人之異者或有鬚髯

關帝聖女工書畫有髭爲女道士見王叔寢齋叢話

舅妻

陸萊仲云通考元豐四年于闐國上表稱有福力知文法黑

汗王致書東方大世界田地主漢家阿舅大官家蓋唐以公

主妻吐蕃回紇故西域諸國猶以舅稱中國也

恐是尊爲母舅

宋史

明史文苑傳王惟儉苦宋史繁蕪刪定自爲一書後潘曾紘

得惟儉所撰招會異撰徐世溥更定未成而罷今所見柯維

騏宋史新編世不甚重之吳門陳黃中和叔有宋史編惟闕

天文律歷諸志又朱竹垞云吉水劉同升孝則有事改修全

謝山云顧亭林亦曾改修宋史身後歸徐尚書健菴

柳宗元

崇寧三年封文惠侯紹興二十八年加封文惠昭靈侯至

元致和乃進封公耳

魯衛錄

蘇頌撰華戎魯衛信錄宋史本傳無華戎二字又王渙傳

編修兩朝魯衛信錄

改國號遼之前劉淵國號漢劉曜改趙李雄號成李壽改漢徐知

詰始纂號齊後復姓李改唐閩王延義弟延政據建州改號

殷後閩亡仍稱閩僭偽之國不可爲訓

神封元英宗至治二年加封諸葛武侯威烈忠武顯靈仁濟王前蜀

王建封安國公明宗天歷元年加謚顏真卿正烈文忠公加封關侯

顯靈義勇武安英濟王

記五董符起崔秋谷云仲舒子符起不知所出而未知仲舒更有兄

也金一鳳兗州續志曰滋陽縣有董茂舒墓江都相仲舒之

兄葬城南十里馬青社歲久湮沒萬歷間有牛坤者誤開之

其佃人風旋墓中死坤顛狂數月以墓中所攬金牛還之始

獲安又史不載仲舒字今 欽纂書經傳說目錄云字寬夫

亦莫識所本

通精易正義引乾鑿度通精無門藏神無穴

記六惠嵇康幽憤詩魏志康傳注又作昔慚柳下王十朋題魯池

州通隱堂詩亦云下惠何妨介東方未用夸

尊放翁祭王侍御令人文尊卽之微侑以斯文祭韓無咎尚書

文尊卽之莫敘訣終天

用表語王元之守滁日謝表諸縣豐登苦無公事一家飽煖全

籍君恩歐陽公取其語爲詩云諸縣豐登少公事一家飽煖

荷君恩

佛骨韓表本於傅奕前哲已有此言

系文葉氏四朝聞見錄丁集載陸放翁祭朱文公文僅六句云

某有捐百身起九原之心傾長河注東海之淚路脩齒盡神

注形畱公歿不忘庶其歆饗又曰蔡元定先文公三年歿文
公祭文云竊聞亡友西山先生羈旅之櫬遠自春陵來歸故
里謹以家饌隻雞斗酒酌於靈前嗚呼哀哉。宋錢愐錢氏
私誌云王岐公禹玉在翰苑時上鍾愛一公主七歲而薨親
送殯宮歸路悲甚命宮門外再設祭命公作祭文公廣起草
不及乃就馬上自書祝版云惟主如冰如雪如花如月冰散
雪消花殘月缺嗚呼哀哉尚饗皆服其敏辦得體孫季昭誤
記爲楊大年撰章獻后祭文而又變易其辭故錢詹事非之
撰祖父東漢魯峻碑其子所述錄令狐德棻撰其父令狐熙碑
金石魏知古爲父魏府君撰序崔融爲銘金石魯公爲父顏
君廟碑本集祝欽明爲父祝府君碑金石柳開爲父監察御史
柳公墓誌銘河東集富弼爲父富泰公墓誌銘名臣碑傳

宛陵錄

汪彥章周輝清波雜志云林子中賀東坡入翰苑矜父子以文章

名世蓋淵雲司馬之才兄弟以方正決科邁晁董公孫之學其褒美如此後草坡謫惠州告辭極其醜詆彥章毀李綱譽秦檜殆子中之流也周南仲秦檜降僞易諡制庶幾媲美坡公之貶呂惠卿制任盡言上湯侍郎論秦檜劄亦與子由乞誅竄呂惠卿狀不相上下

錢竹汀又云趙州永安院度僧記馬瑒撰馬瑒書元豐八年記其

父正甫奏請度僧事末題平昌孟永填諱帶御器械張填填刻孤哀子萊孫稱孫識寶祐元年從事郎資善堂檢閱劉仰祖填

諱又武億授堂金石跋麻衣子神字銘南陽貢士李珣填諱碑由字述魯翀譔次男字述魯遠書翁以爲填諱雖起於唐至宋以後屢見然亦不盡用此例也亭林所舉張說陳子昂

顏真卿劉禹錫白居易李翱外如上條所稱令狐德棻魏知古諸公皆直書先代祖父名字蓋準臨文不諱之例漢已來盡然觀魯峻碑及蔡邕祖攜碑可證

記七小年夜 武林舊事禁中以二十四日爲小節夜三十日爲大節夜

縣名賜 又嘉慶五年秋江西寧州逆民劉聯登等滋事卽時撲滅上嘉寧州士民敵愾全仇知方向義州治保護無虞特改寧州爲義寧州

伏辨放債王制鄭注異其死刑之罪而要之卽是囚之伏辨也京債之名見舊唐書宣宗紀會昌二年選官借支料錢之例亦起於此

仲中隸釋柳敏碑五行星仲廿八舍柳宿之精亦以仲作中也顧

亭林金石文字記言之

林許彥周詩話載子厚石刻云龍城柳神所守驅厲鬼山左首
福土氓制九醜與許周生所藏石刻文小異蓋仍龍城錄之
偽也

石刻金石萃編高克尊銘其文皆凸起魏始平公造像記用恭
子格陽文凸起其他蓋額字凸起者甚多

本朝制字者有二人一曰達海一曰額爾德宜皆諡文成全祖

望國書賦云惟兩文成不亞朱襄或作或述接武擅場又攷

遼契丹字太祖阿保機製突呂不耶律魯不古贊成之

紀本金女直字完顏希尹撰本名谷神

頡立廟盤屋例祠于上京納里渾莊

吾兒國字至元二十五年勅中書省奏目及文冊皆不許用

長吾字竝用蒙古書乃帝師八思巴撰郡縣建廟通祀

元史釋老

傳又法苑珠林云造書凡有三人長名曰梵其書右行次曰

佉盧其書左行少者倉頡其書下行

編千字文遼天慶八年涿州雲居寺石經塔記後列刻經目錄每十

卷爲一帙標千字文爲號見金石萃編

集字刻石金石萃編唐開元時內侍吳文碑沙門大雅集右軍書宋

天聖時絳州重修夫子廟記及解州鹽池新堰箴皆集右軍

書集刻者跌跌望明道二年玉兔淨居詩沙門靜萬集右軍

書金皇統四年沂州普照寺碑集柳書范氏天一閣藏碑上

清宮尚書省牒南宋湯純仁集歐書倪處士墓表至正二十

年危素撰張翥集右軍書楊賓鐵函齋書跋云碑刻集右軍

書見諸載記者凡十八家皆從聖教序出

歪頭元史世祖紀二十九年有郎中歪頭使安南回又是一人

全名微子眇爲宋始祖而景公所養子名眇左傳載之范史河

先代間孝王開傳其六世孫亦名開魏志高句麗傳有王與其曾祖竝名宮上海李心衡金川瑣記夷人兒初生時延喇嘛誦經咒命名大抵取藏經中絕嘉者以致什伯雷全竟有父子一名

人名用數目字清波雜誌徽宗寵嬪念四卽閭婕妤好也吳曾能改齋漫

錄崔念四政和間妓宋史方臘傳其黨陳十四李全傳射陽湖豪民王十五附全明史寧王傳宸濠蓄羣盜有閔念四吳十三凌十一俞諫傳江西賊胡念三

稱名代姓元史成宗語左右曰全平章真全材也謂鄂爾根薩理其

父名萬全因稱爲全平章亦是單呼下一字亦有舉中一字

者元至正十一年長興重修學宮記楊維禎撰爲州長火魯忽達修廟而作稱曰魯侯見錢氏金石文跋尾續

古蜀志古朴見秦宓傳明亦有古朴見明史列傳

通全姓通譜古人謂之越認金石萃編晉司空太原王卓碑貞

元十七年追樹有張說越認范陽王綰越認瑯琊之語至陳後主時都官尚書孔範與孔貴嬪結爲兄妹明成化中萬安爲相與萬貴妃通族則更可笑也

異姓兄弟北齊書漁陽王高紹信與富人鐘長命結爲義兄弟妃與

長命妻爲姊妹舊唐書高力士傳金吾大將軍程伯獻與力士結爲兄弟宋史李全傳與金元帥張林結爲兄弟

長隨明史宦官傳長隨何鼎爲張鶴齡所害

勝關崔秋谷云金史劉豫傳關勝者濟南驍將屢出城拒敵豫殺

勝出降又王象春齊音云金兵薄濟南守將關勝善用大刀
屢戰兀朮金人賄劉豫誘勝殺之是勝未嘗降金也宋史誤
無手明史忠義傳張獻忠陷武昌巡江都司朱士鼎被執戟手

大罵賊斷其左右手不死賊退令人縛筆於臂能作楷字招
集舊卒訓練如常又宋上官融天聖時人友會談叢今京師有一

婦人年四十餘全無兩臂行衢求丐每梳頭髻右足夾櫛左
足縮髮及繫衣浣面亦如之輕捷便穩與手無異人多擲錢
贈之亟伸足取貫革繩之上略無凝滯段夕拜瞿言景德中
因事到岳下見一婦無雙臂用兩足刺繡鞵片織紵與巧手
相若崔秋谷攤飯續談云漳溪丁司馬韻含藏斷臂將軍畫
梅花蒼秀絕倫將軍朱氏名士鼎字玉節新安人雙手俱無
束一假手倩人濡墨懸筆而爲之者明史不書其里及字徐士俊家有

草書三幅從楚中麻城得來乃梅太史之孫名益字雪崖其
兩手爲獻賊所去而書法甚佳又二十年前游豫省遇一司
錢穀幕友陳姓者能以足大指撥算繁銖兩無爽且極便利
亦絕技也嘉慶辛未六月杭城有丐者自山東來無兩手能
以足盤辮髮射小弓箭擲骰子余親見之

明代木工營造北京梓人蔡新官工部侍郎見袁尚寶符臺外集嘉

靖間大匠徐杲歷通政侍郎工部尚書見馮猶龍智囊

徐杲見明

史官李芳傳謝肇淛五雜組徐杲官至大司空巧侔前代而不動

聲色又有蒯義蒯剛蔡信郭文英俱以木工官至工部侍郎
則不獨蒯祥一人而已

木蘭古今碑刻記有唐人孝烈將軍廟碑在河南歸德府治

扇趙槩事亦見宋史本傳及東坡趙康靖公神道碑陸容菽園

雜記云摺扇一名撒扇或作筵非

宋史王昭遠錢易虞允文傳所說詩扇清波雜志范

魯公扇書大暑二句朱竹垞跋宋太宗書庫碑云雜書扇子一百三十六柄皆團扇也

煙

全謝山鮎埼亭集有淡巴菰賦其序云淡巴者屬呂宋旁近

小國名石馬屬海澄汪韓門嘗輯金絲錄四卷惜未見

封

柏謝肇淛云嵩山嵩陽觀有古柏一株五人聯手抱之圍始合

下一石刻云漢武帝封大將軍施愚山有嵩陽漢柏詩注云
舊三株相傳漢武封三將軍大者圍三丈五尺次者三丈昔
人謂在漢已封當是殷周時物丁未冬火其一矣怪時人無
敬護者剝膚穿腹行就摧朽故作詩傳諸父老有岱松大夫
輩俯視成耳孫之句

嘉慶四年二月二十四日奉

上諭現在會試屆期士子文藝

詩策內於朕名自應敬避如遇上一字著將頁字偏旁缺寫

一撇一點書作顚字下一字將右旁第二火字改寫又字書作琰字其單用禺字頁字炎字俱無庸缺筆至乾隆六十年以前所刊書籍凡遇朕名字樣不必更改自嘉慶元年後所刊書籍均着照此缺筆改寫欽此又據武英殿奏明詩韻內上聲第二十八部改儉字爲部首刊刻通行

嘉慶四年十月奉 上諭據軍機大臣等將安徽省貴池縣民方士傑呈遞封奏進呈閱其文理清通事件尚屬可行已畱中備覽方士傑着賞授入學生員准其鄉試欽此十三年六月湖南綏靖守備張聖謨引見 上諭部臣曰聖謨二字豈臣下所可命名兵部於該員到部時卽應將伊名更正何以漫不加察嗣後引見各員有命名不合者當畱意更正張聖謨着改爲張謨欽此

原任總憲周公名元良上改名爲謨

余於海鹽張芑堂所見錢武肅告太湖水府龍簡拓本順治初
出水重白金二十兩高五寸六分周刻一龍上雲下水中作
精楷十行凡百七十九字案寶正三年爲唐明宗天成三年
吳氏十國春秋不載此事可補其缺文曰大道弟子天下都
元帥尚父守中書令吳越國王錢鏐年七十七歲二月十六
日生自統制山河主臨吳越民安俗阜道泰時康市物平和
遐爾清宴仰自蒼昊降祐大道垂恩今則特詣洞府名山遍
投龍簡恭陳醺謝上答元恩伏願合具告祈兼乞鏐壬申行
年四時履歷壽齡遐遠眼目光明家國興隆子孫繁盛志祈
元祝允協投誠謹詣太湖水府金龍驛傳於吳越國蘇州府
吳縣洞庭鄉東臯里太湖水府告文寶正三年歲在戊子三
月丁未朔二十六日壬申投其出水頭末詳芑堂所著金石

契中

近見友人攜示洪武時公差給驛勘合一幅皆黃錦織成高九寸長尺八寸四圍雲龍黑綾前段云皇帝聖旨公差人員經過驛分持此符驗方許應付船隻如無此符驗下損疑便字給驛各驛官吏不行執法循情應付者用此循字不解俱各治以重罪宜令準此中幅繪一船帆檣悉具組織工細後署洪武二十三年月日上蓋制誥之寶另行墨寫信字貳伯貳拾玖號

嘉慶五年三月趙殿撰文楷李舍人鼎元充冊封琉球國使

上特賜右旋白螺供奉舟中螺能定颶風神物也於五月七日自閩開洋風波不警六日而抵中山歸亦如之前此出使者未之有焉十一年二月海盜蔡牽滋擾臺灣將軍賽公統兵勦捕上諭云從前福康安平定林爽文時曾攜帶大利

蓋吉祥右旋白螺往來渡海風帆平順茲亦發交賽沖阿祇
領敬誠帶往渡洋護佑候事竣凱旋之日大員齋送來京繳
進供奉欽此十三年編修齊鯤給諫費錫章奉 命冊封琉
球舟供神螺於閏五月十一日自五虎門放洋十七日抵其
國禮畢回舟於十月九日自馬齒山放洋十七日抵閩省兩
遇風暴俱化險爲平也恭讀

高宗御製文三集有右旋白螺贊注曰每年藏中喇嘛於新正
及萬壽節進丹書所陳供器時有獻右旋法螺者以爲奇寶

而不多見涉海者攜帶於舟則吉祥安穩最爲靈異

中山物產有左

旋螺徐葆光詩云貢篚文螺異虛中獨

左旋蓋別是一種不過異于凡螺耳又明史天方國有回

回始祖馬哈麻墓墓後有井泛海者必汲以行遇颶風取水
灑之卽息無名氏朝鮮志云新羅文王時東海中有小山浮

來隨波來往王異之泛海入其山上有一竿竹命作笛吹此
笛則兵退病愈旱雨雨晴風定波平號萬波息笛歷代傳寶
之海外固多奇物也以上五條失刻故綴此

蛻稟

翁常言詩文多存不如少存可以藏拙故手定蛻稟刪棄甚夥

如獨坐云中酒情懷春欲睡養花天氣雨如毛病中云半生

願學庚桑楚垂暮翻全司馬牛答友云雀言無計尋公冶馬

語何從問李南

見抱朴子

醉後示友云不得爲卿亦常事煎調誰

肯效孫廉感事云爭說邯鄲新曲好那知皆託李奇來又云

漫道數奇常不偶井泥終見出爲塵

山李賀筌篴謠

又云植羊種米

眞癡絕莫笑疇麻不辨人戲和人詠白桃花云近來老卻桃

花面一任風吹不發紅輓陳冶泉先生云研精內外傳

著左傳

國語熟復白蘇詩

二公詩背誦如流

感念風痺手猶然跋志疑

先生

疑云識見卓徵引博不蔓不支惟精確堪稱馬班功臣是乃超絕傑作志疑左通各壇其學交葉蘭芬連枝諒萼老夫

昏忘撫卷

隨憶錄此不能全也又與友人書云近日士風之壞

師忘其爲師弟子忘其爲弟子諱浪徵逐無所不至偶得數

行佳文幾聯佳句輒氣凌霄漢前無古人每遇府縣小試書

院月課競爲捉刀索價甚高必飽其所欲而後已品之不立

至於如此則他日之呈身識面詭遇求合不待言矣鄉先輩

許藻園

名浩

有言作文以讀書爲主讀書以立品爲主貪作文

而不多讀書猶之蒔無根之花雖得一二日妍麗其萎可立

俟爾讀書而不知立品譬之敝篋敗簾亦嘗貯典籍其中人

能使敝篋敗簾不淪於糞壤蕪穢者哉其言最爲明切足下

出於名師之門學有淵源行無枝葉遠近宗之惟從游者衆

來而不拒得毋有薰蕕全器之慮乎某嘗怪太史公作仲尼弟子傳以公伯僚厠弟子之列未免失倫足下聖非孔孟宜稍別白之勿使亂羣庶不全夫世俗之所謂師也已

宋何光遠人

充試取貲其後罹大禍見宋史蘇易簡傳

或問百穀之名翁曰百者假成數以爲號韋昭注鄭語云百穀黍稷稻粱麻麥荏菽雕胡之屬文選班固靈臺詩注引薛君韓詩章句云穀類非一故言百也晉楊泉物理論梁稻菽三穀各二十種爲六十蔬果之實助穀各二十凡爲百穀并疏於穀中數之恐非且魯語祭法稱百穀百蔬必欲實其數則疏豈止二十乎古有曰三穀者楊泉謂梁稻菽是也有曰五穀者鄭康成注周禮職方高誘注淮南修務文選西都賦注引韋昭竝依管子地員篇謂黍稷菽麥稻是也而康成注天

官疾醫之五穀又據月令以麻黍稷麥豆爲五王逸注楚辭大招之五穀又以稻稷麥豆麻爲五

管子書每言五穀菽粟不知又以何者爲五

有曰六穀者鄭司農注天官膳夫據食醫職謂稌黍稷粱麥苽是也有曰八穀者星經八穀八星主黍稷稻粱麻菽麥烏麻是也有曰九穀者先鄭注太宰職謂黍稷秬稻麻大小豆大小麥後鄭去秬大麥而入粱苽汜勝之種殖書言九穀有米無稷段成式酉陽雜俎又以黍稷稻粱三豆二麥爲九元司農司撰農桑輯要又以黍稷稗稻麻二麥二豆爲九背年嘗與歙縣程廣文瑤田論之程因著九穀考一卷見所刻通藝錄中辨之甚詳

以下隨時記錄故不次

相傳韓信有後於粵信乎曰崔秋谷嘗語余云李龍湫天植淮陰釣臺詩聞道遺孤在南粵王孫往事不須哀自注淮陰侯

死蕭相國託孤於尉佗去韓之半爲姓今韋氏者侯之後也
見張羽集馮山公景亦有淮陰侯有後歌案粵述云粵西土
官多韋姓呂后擒信時舍人負其幼子求救於蕭何何泣下
謂中土不可居乃作書屬南越尉佗撫之子孫因以韋爲姓
其何書尚存王和仲燧所輯千百年眼一書曾載此說鍾竟
陟亦附之鑑末第漢法踵秦之慘酷彼高祖時蕭何敢與佗
通書耶存此以質博雅愚謂所辨良是向見來集之樵書張
大齡支離漫語皆載其事蓋以信負大功冤死百世之下猶
惜之聞其後嗣克延不覺津津樂道事之有無置弗論可也
或言注通鑑之胡梅磻與文信國進士全年當有可攷曰胡注
通鑑序明云寶祐丙辰出身進士科余曾見宋刻寶祐四年
登科錄胡三省在第五甲字景參小名蒲孫小字子持年二

十七四月二日丑時生不云字身之也錄載第一甲二十一人第一人文天祥字宋瑞小名雲孫小字從龍年二十五月二日丑時生曾祖安世祖時用父儀又二甲四十人第一名謝枋得字君直小名鍾小字君和年三十三月二十四日亥時生二十七名陸秀夫字君實年十九十月八日寅時生黃震在四甲年四十四五月十四日辰時生

僧以夏臘紀年或稱僧夏或稱僧臘亦有作納者何義曰王蘭泉侍郎云金正隆二年京兆府重修府學記有云進納落髮又云僧納四十六納卽衲字謂其著衲衣四十六年也又師兄弟謂之法眷乾德四年京兆府重修清涼建福禪院記末題全學法眷僧名竝見金石萃編第四十一卷

魯連遺燕將書富比陶衛國策史記注或謂陶朱公衛公子荆

或謂衛冉商鞅何者爲是曰陶是陶朱衛當指子貢列子楊朱篇所稱子貢殖於衛也冉鞅凶終未必舉以告燕將

子與氏稱亞聖當有所本曰本趙氏孟子題辭但三國志吳諸葛恪傳子張子路子貢等七十之徒亞聖之德然各有所短是諸賢皆有亞聖之目至元仁宗始尊尊孟子也唐書姚崇傳遺令稱孔子爲亞聖元世祖以孔子爲中賢則知不足知聖耳

詩焉得諉草言樹之背後人因以稱母何也或謂起於孟郊游

子吟

文苑英華作孟夷中

不關此詩果是歟曰房半以北爲北堂北堂

爲背婦人所常處因以稱母亦無不可杜甫送許拾遺歸觀

詩慈顏赴北堂岑參送韓巽覲省詩北堂倚門望君憶皆本

此義

宋史李全傳徐晞稷稱全妻楊妙真爲恩堂

若諉止訓忘毛傳孔疏及郭注

爾雅並不以諼爲草名伯兮之諼草猶陸士衡贈從兄詩所云安得忘歸草言樹背與矜也自說文引詩作蕙直曰令人忘憂草而爾雅又作蕤釋文引別本作萱蕤二字於是實指爲草名矣俗稱母萱堂不過撮合之語爾至游子吟云萱草集堂階游子行天涯慈親倚堂門不見萱草花乃母思其子於義不合西溪叢語又有一說今人多用北堂萱堂於鰥居之人以其花未嘗雙開也

禹貢終南惇物是二山名漢志惇物卽垂山在武功而隸釋無極山碑以惇物爲終南所產與松篠全科是否曰程大昌雍錄亦云終南高廣多出物產故曰惇物非別一山名水經注末卷又以華山爲惇物皆別解不可從

經史中有宿畱二字當讀何音曰此蓋漢時方言公羊僖元年

注孟子公養之仕及於崇注史記封禪書漢書郊祀五行志
李尋傳後書來歙韋義傳多有之解家皆音秀溜惟顏師古
云宿先欲反班馬字類作先就反葉夢得避暑錄話云應畱而畱則平
音應去而畱則去音宿者止其所居也是宿宜讀如字然古
人星宿之宿亦音風信宿之宿亦音秀似不必泥於分音故
史記索隱曰宿畱音秀溜若依字讀亦通宿畱又作須畱見後漢書清河王慶
傳北音讀宿爲須也

有以虞幕爲問者曰左昭八傳史趙言幕至瞽瞍無違命魯語
展禽言幕能帥顓頊有虞氏報焉鄭語史伯言幕能協風是
舜之先國于虞爲虞氏幕乃舜祖孔疏及路史後紀十二辨
之甚明韋昭以幕爲舜後虞思堯典疏引皇甫謐謂堯始封
舜于虞妄也

春秋傳十五年九月己卯晦震夷伯之廟成十六年六月甲午晦晉侯及楚子鄭伯戰于鄢陵晦字左傳無說穀梁於己卯晦謂晝冥於甲午晦謂月終何以不全曰公羊凡晦皆以爲冥據左氏成十六年傳有陳不違晦之語則月盡是也書朔不書晦公羊之曲解春秋無此例

賈公彥周禮闢人疏引論語晨人疑唐時本不作門字曰恐是對闔人而言改稱晨人未必唐本有異他處皆作晨門

魏陳畱王燕王宇子也而宇上表稱臣東魏孝靜帝臣其父直石晉出帝臣其父敬儒周世宗臣其父柴守禮宋度宗臣其父福王與芮當時恬不爲怪殊不可解曰世間事何所不有唐莊宗后劉氏笞其眞父不認而反拜張全義爲假父晉出帝以父爲臣而反稱契丹主德光爲祖豈非異事唐龐勛反

徐州自稱天子令父舉拜之更無足論矣

孫宣公孟子音義好爲人師章引趙注有桐子字今本所無曰蔡鐵耕云此趙岐章指用法言學行篇語非注也僞疏削去章指故無之桐童蓋音全通借

禮記卷首及王制疏竝引盧植云孝文帝令博士諸生作王制蓋因史記封禪書文帝使博士諸生刺六經作王制之語也曰王厚齋藝文志考證鄭漁仲禮經奧論皆仍盧子幹之說但史索引劉向七錄曰文帝所造書有本制兵制服制篇方同續古今攷據之謂非今之禮記王制則知其時有兩王制矣又禮疏言考工記孝文使博士作亦未確

前人言唐彥謙題漢高祖廟詩耳聞明主提三尺是歇後語東坡詩買牛但是捐三尺或本此曰漢書高帝紀吾以布衣提

三尺取天下韓安國傳亦但云三尺皆無劒字師古注三尺劒也俗本或加劒字唐蘇二詩乃用漢書不得以爲歇後市肆稱牙行亦有所出否曰周禮肆長疏一肆立一長檢校一肆之事若今行頭者也此行字所出至牙字古人以爲互字之譌恐未然舊唐書食貨志市牙各給印紙亦曰牙子見盧杞傳安祿山與史思明全爲互市牙郎見本傳又新唐書張又新傳嘗買婢遷約爲牙僧搜索陵突如改牙作互義有難通蓋牙與衙全主互市者供官衙役使今謂之衙人史記貨殖傳所云駟會是已

周禮職方氏計邦國以知道里之數亦祇約計其數而已王制所稱九州建國之數元與周官不合先儒以爲夏殷之禮却無確據曰鄭注二禮頗牽合難通如謂九州之界其一爲畿

內千里餘八州各有六千里每州封四公六侯十一伯二十五子百男州二百一十國又以男備數焉則八州之地凡有三十二公四十八侯八十八伯二百子千三百十二男周之封國若是其多乎崔秋谷云此是虛擬其數言若以封國則當有如干耳

大司徒之職曰諸公地五百里諸侯地四百里諸伯地三百里諸子地二百里諸男地百里何以與孟子王制大異曰以子與氏在所損之言觀之必非初封受地之數康成大宗伯注言劉子駿等議古有此制而以孟子爲俗說未免乖反太史公漢興諸侯王表序云魯衛地各四百里明堂位云魯七百里全爲難信

論語不時不食鄭謂非朝夕日中時朱子引王制五穀不時果實未熟之類爲解孰是曰朱子蓋本後漢書鄧皇后紀前書

召信臣亦曰不時之物有傷於人不宜以奉供養勝舊注多矣鄭注禮運飲食必時引內則食齊視春之屬仲尼燕居味得其時注據周禮食醬春多酸獸人冬獻狼之屬三注各殊左傳昭十九年子產曰寡君之二三臣札瘥夭昏杜依賈注夭死曰札小疫曰瘥短折曰夭未名曰昏本文有夭字以之訓札爲複而夭死小疫之解似未確曰此言二三臣亦不得謂昏未名鄭注周禮膳夫及大司樂大札云疫癘也爾雅云瘥病也韋昭注周語魯語仝而周語昏字注云狂惑曰昏晉語注云昏狂荒之疾以左傳後年夭昏孤疾證之韋注甚允左襄十八年楚伐鄭師次旃然杜但言旃然水出滎陽成臯縣水經注謂卽索水出京縣西南嵩渚山未知是否曰京索二水接流難以劃分酈氏指爲索水必確有見無可疑也又唐

鄭榮開天傳信記云旃然卽濟水濟溢而爲榮遂名旃然

易鼎卦形渥注渥沾濡之貌釋文云鄭作劇本義引晁氏曰諸

本作刑劇今從之果孰是曰本義是也周禮秋官司烜屋詠

鄭注讀如其刑劇之劇賈公彥引易作刑屋漢書敘傳底屋

鼎臣新唐書元載傳贊引易亦作刑劇則知屋乃劇之省渥

爲劇之譌形刑古通用字服虔漢書敘傳注楊勛穀梁僖廿

三年疏竝作形渥楊疏并仍輔嗣沾濡之解似欠安虞翻云

渥大刑也

左莊卅二年疏引晉司隸傳祇於王愷家得鴟鳥一事引晉語

諸公讚是何書曰此晉傳暢撰晉諸公敘讚也見晉書語字

當衍

禮八蜡之祭先嗇也司嗇也百種也農也郵表嘏也貓虎也坊

也水庸也經文甚明何以諸家異說曰皆不可從惟陳祥道
禮書依經是矣鄭康成蔡邕去百種而增昆蟲觀祝辭有云
昆蟲母作則不在八蜡中可知王肅去昆蟲而分貓虎爲二
夫貓虎一物爾故經文先以禽獸二字總稱之其不分可知
他若或去先嗇或以郵表啜爲二竝屬臆解至雪山王氏詩
總聞偏據祝辭而曰土神一宅神二水神三壑神四昆蟲神
五草神六木神七澤神八尤穿鑿難通

聘義孚尹旁達鄭讀爲浮筠謂玉采色陳澔何以別解曰陳氏
依文爲訓耳元微之出門行求之果如言剖出浮筠風黃山
谷爲洪駒父作晉州學浮筠亭銘皆用鄭注也

有問寧都三魏文優劣者曰三魏之文

伯子名際瑞字善伯原名祥叔子名禧字冰叔

季子名禮字和公

予每喜誦之而明快精透尤推叔子如駁老泉權

書論漢高帝咎歐陽公論包拯狄青二劄子獨具隻眼有關世道他人無此識也其餘格言讜議可置之座右者甚多惟龍脩記二篇隱約其辭不知何物當詢之博雅君子小三魏則以與士爲勝興士名世傑善伯子

歐陽公移高司諫書責其不能辨范仲淹之奪職余靖尹洙之貶斥是不復知人間羞恥事決其非君子然攷宋史高若訥傳居官剛直不阿彊學善記兼通歷律醫書歐公之言似太過曰憤激於懷未免有溢惡之語嘗聞魏冰叔性慙多效忠告而所作文必錄橐彭躬菴名士望規之曰人有聽言而過已

改者子文幸傳於世則其過與之俱傳子不忍沒一篇好又字而忍令朋友已改之過千載常新乎吾於公此書亦云

胡澹菴乞斬秦檜一疏字挾風霜千載下讀之猶增長人志氣

惟疏中檜實管仲之罪人一語似未合管仲豈易及哉直是
稱美奸檜矣曰疏中詆王倫狎邪小人亦似太過倫宣力勤
苦出使不辱執節而死小人能如是乎魏伯子史論欲改管
仲二字作莽操且擬刪去孔子曰以下六十八字謂此蓋宋
儒羞稱五霸習氣楊士奇跋胡忠簡封事藁云揭文安公謂
此書本左司郎中豐城范瑋舜文所爲將奏之以示忠簡忠
簡曰書奏卽不免南遷子有老母不可以累母吾以奏之遂
有新州之命李日華紫桃軒雜綴亦有此說恐不足信崔秋
谷禹航清課云近見宋豐城志載瑋欲與銓相繼論奏和議
胡首抗章范實懲慝之胡之逐又臆其行未嘗言此書范所
爲不知文安何自而云然又澹菴遺表臣莫瞻九陛行卽三
泉相如草封禪以貢諛竊所不取張巡爲厲鬼以殺賊死亦

不忘

漢書孝武紀元朔三年詔云刑罰所以防姦也內長文所以見愛也張晏曰長文德也師古曰詔言有文德者卽親內而崇長之似未明確曰宋無名氏南窗紀談云內長文之語了不可解張顏說終不能服人意許少尹右丞言江南舊本以內爲而傳寫之誤容或有此而其義通矣近見一士人言前輩校本以內爲而長爲肆文爲赦其於下文尤爲貫穿但改字太多不知果有據否

許周生云內長文卽文無害之意

莊子秋水鵲夜撮蚤釋文謂崔本作爪云鵲鵲夜聚人爪於巢中許慎云鵲夜聚食蚤蚤不失也司馬本作蚤三者何從曰蚤蚤二字形相近蚤爪二字古相通皆傳本之異淮南主術作鵲夜撮蚤蚊似莊子脫一蚤字高誘注與崔譔全是崔用

高說然此但言鷗目之明不必實有其事注家皆屬臆解

世間塑繪觀音皆女像果女身否曰此變相也釋藏有十一面

觀世音經唐李儼撰益州多寶寺道因法師碑師與元奘歐

陽通書碑中述師將詣洛中感觀音之靈異云杖錫出山予

焉孤遠恐懼刑憲時禁僧游涉靜念觀音少選之間有僧欬至皓

然白首請與俱行迨至銅街暨於金地俯仰之際莫知所在

則非女身可知王蘭泉跋云天竺夢泉供出山觀音是男像

亦白首老人與碑所紀合六朝唐宋名手寫像無作婦人者

問讀經史之法當如何曰經須逐字鑽研更參異全於別條而

融貫之史須逐事檢對先分門類於胷中而粹聚之諸葛公

略觀大意靖節翁不求甚解似非讀書常法

顏氏漢書敘例具列注家名氏爵里二十三人其中三人不詳

皆唐以前者果盡在是歟曰前代多重漢書不比說史記纂
纂一二家然攷隋志說漢書者尚有劉顯夏侯詠蕭該包愷
陸澄韋稜姚察項岱八人其注已亡者劉孝標梁元帝二人
小顏何以不及蓋搜采既疎駁棄又甚亦太自擅矣又師古
叔父游秦撰漢書決疑十二卷見唐藝文志索隱每引之所
稱大顏是也敘例不及游秦豈擯取其義并沒其名乎

檀弓衛太史柳莊死獻公與之邑裘氏與縣潘氏鄭注裘縣潘
邑名孔疏與之采邑裘氏及縣潘氏釋文縣音元而鄭漁仲
通志略以邑裘連讀又謂邑裘縣潘皆衛大夫之氏未知有
據否曰漁仲臆解殊不足信鄭孔但言二邑名不詳其地諸
藹堂有一說云縣當讀形句切裘氏邑名潘氏縣名傳云上
大夫受縣衛君加禮柳莊既與之邑曰裘氏又與之縣曰潘

氏故用與字貫之此說頗通案春秋定七年齊侯衛侯盟于沙水經注沙水又東南逕陳畱縣裴氏鄉裴氏亭西說文潘水名在河南滎陽蓋古縣之因水受名者

舊唐書蘇頲傳元宗欲於靖陵建碑頲諫曰自古帝王及后無神道碑若靖陵特建則祖宗之陵皆須追造元宗乃止韋湊傳亦有此語靖陵乃元宗母昭成后竇氏也然則陵寢無碑歟曰潘蒼崖金石例言神道碑天子有之今世尚有宋文帝神道碑墨本金石錄唐昭陵刻石文太宗爲文德皇后立歐陽詢書高宗乾陵述聖記碑武后撰中宗書舊唐書高宗追諡太子宏爲孝敬皇帝親製睿德記并自書之樹於恭陵側石墨鐫華武后母楊氏順陵碑武三思撰相王旦書是元宗以前陵固有碑矣

金石錄唐立梁宣帝明帝二陵碑乃開元廿一年其裔孫嵩追建韓休撰文蓋在其

後也

有文無行之人自昔輕之然文至于不可磨滅似亦未可輕也
曰君子之文以不磨滅爲幸非君子則以不磨滅爲不幸使
後人一番瀏覽一番譏嘲不如磨滅之乾淨矣魏叔子有言
士不立品文雖貴實賤士不適用文雖切實浮君子雖愛之
賞之不過如鸚鵡之能言孔雀之羽毛已耳文人方自恃其
文爲撐天地光日月流川峙嶽之物而君子乃等之於禽鳥
耳目之玩不亦大可哀耶

北魏時有建議朝廷減賦若干則田主亦減佃戶租若干者此
議果公允乎曰魏冰叔論之矣其言云每歲荒災佃戶乞減
於田主田主不能乞捐於朝廷卽捐亦未必及災荒實數況
田之美惡不等雖全在一方有全無害者有半害者有全害

者若照捐賦例通行減租則全無害者減半無倖免全害者減半爲虛設不公甚矣故朝廷只宜捐田主之賦而佃戶聽民間自減可耳

淮南子天文訓淮南元年冬太一在丙子冬至甲午立春丙子高誘注淮南王作書之元年一曰淮南王安卽位之元年二說孰是曰劉安續封淮南在孝文十六年丁丑而其封在四月漢初以十月爲歲首則四月仍是丙子也若作書不知何歲安初就國豈卽招致諸儒著書乎錢竹汀云太一卽太歲王安始封之年爲文帝十六年下距太初元年六十歲太初之元太歲在丙子則是年亦在丙子矣推是年冬至己酉立春則甲午蓋冬至與立春相去四十五日有奇古今不易自甲午訖丙子僅四十三日此理之所必無者許高舊注本無

此語後人竄入不足信

客問漢有幾劉向幾劉歆曰讀范史祭遵傳武威將軍劉向從遵伐公孫述劉植傳植子向嗣封昌城侯徙東武陽侯與更生爲三矣若劉歆一王莽封爲祁烈伯奉顓頊後見前書莽傳一更始子封穀孰侯見後書劉聖公傳一劉植兄爲驍騎將軍封浮陽侯見植傳耿弇傳有騎都尉劉歆祭遵傳有驍騎將軍劉歆當卽植兄歆不足道更生著名西漢爲宗室忠臣何爲全其名哉相去僅十數年爾

桓榮傳有左丞劉歆

僧元應一切經音義聞有二本各異然未之見曰非二本乃兩書也釋家一切經音義唐元應撰道家一切經音義唐史崇著世罕傳之兩書徵引甚博畢秋帆尚書嘗欲與陸氏經典釋文合刊之惜未果

孟子古注惟趙氏得存文選注中引劉熙注二十一條引蔡母
遂注四條熙注本隋志云七卷蓋亦無外書者而酒德頌引
之曰槽者齊俗名之如酒槽也郭有道碑引之曰隱度也括
猶量也七篇中無槽字括字不知注在何所豈劉本與趙本
異歟曰此却難曉昔年曾詢翟晴江先生晴江時輯四書攷
異初成亦不得其解蔡雲云括猶量也疑是李善說觀崔子
蓋釋梁惠王章隱其無罪之隱顧廣圻云玩齊俗二字當注
在槽食句下劉注上文必有增讀若槽句選注未及詳引耳

海寧楊文蓀云後漢書儒林傳程曾作孟子章句高誘呂氏
春秋序曰誘正孟子章句又隋志有鄭康成注孟子七卷今
皆無傳諸書均未引及宋史藝文志有楊雄注似偽託

國語優施謂里克妻曰主孟昭我韋注孟里克妻字而史記呂
后紀索隱云孟者且也不從韋注孟字何以訓且曰韋注又

云孟或作盍小司馬蓋從或本爲訓而誤仍作孟耳

農人稼穡維寶而詩云彼有不穫穰此有不斂穧彼有遺秉此有滯穗孟子亦言粒米狼戾何以不愛惜若是曰此特以贈孤寡爾足見古風淳厚有和睦相卹之意非暴棄也周密浩然齋雅談載葉正則作呂師愈墓誌述其儉以起家之狀云一扇十年尚補緝之道遇墜炭數寸亦袖攜以歸鄙吝可掬豈足語于斯哉

千字文有二齊蕭子範之作不傳而梁周思纂所次之字梁書南史皆以爲王羲之書乃尚書故實云武帝命殷鐵石於鍾王書中揭千字召與嗣韻之一日綴成御覽引梁書武帝取鍾王眞蹟授與嗣令選不重複千字韻而文之玉溪清話又云梁武得鍾繇破碑愛其書命與嗣次韻成文所說不全何

也曰宋史李至傳亦言是鍾繇破碑不言右軍盛百二柚堂
筆談云右軍所書卽鍾千文也金壇王氏鬱岡齋帖題曰魏
太尉鍾繇千字文右軍將軍王羲之奉敕書起四句云二儀
日月雲露嚴霜夫貞婦潔君聖臣良結二句與周氏仝則千
字文有三矣

世所傳文昌之說果可信乎曰文昌星神也古祀屬之天神其
辨證詳韓門綴學續編祠廟徧天下而列在祀典則自嘉慶
六年始是年五月初十日奉 上諭京城地安門外舊有明
成化年間所建文昌帝君廟宇久經傾圯碑記尚存特命敬
謹重修現已落成規模聿煥朕本日虔申展謁行九叩禮敬
思文昌帝君主持文運福國佑民崇正教闢邪說靈跡最著
海內崇奉與關聖帝君相同允宜列入祀典用光文治著交

禮部太常寺將每歲春秋致祭之典及一切儀文倣照關帝廟定制詳查妥議具奏欽此

高祖谿父公桐乳齋詩集消息子五古十韻前人未詠及此未知有故實否曰抱朴子修闕篇撻齒則松櫨不及一寸之筵挑耳則棟梁不如鷦鷯之羽是剔牙治耳之具晉已有之武林舊事小經紀列消息子

東坡嘗自號老泉以蘇氏先塋有老人泉也則後人以稱老蘇誤矣曰葉石林焦弱侯閩百詩皆辨其誤東坡寄鐘山泉公詩却有老泉來喚人稱泉公爲老泉而不諱其非編禮公之號明已又東坡行二故一字和仲子由一字同叔今稱坡爲長公亦非黃山谷題李氏園詩題詩未有驚人句會喚謫仙蘇二來侯鯖錄魯直戲東坡云二丈書可名換羊書歐陽公

蘇明允墓誌銘云後生學者以其父子俱知名故號老蘇以

別之又云生三子曰景早卒

坡翁又字子平見文與可丹淵集

蕭山有武佑廟來氏樵書云神姓厲名狄秦人與項羽起山陰功不竟死史既失紀不知何出曰事見輟耕錄古來跡全而名沒者多矣如辛翼與張良共報讎見緯略李仲元名弼與嚴君平偕隱見法言及蜀志秦宓傳應曜隱淮上與四皓並徵而不出見廣韻牛牢字君直光武布衣時交屢徵不至是嚴子陵一等人見高士傳子陵有友高獲見桐廬縣志范史及羣談采餘武陵漁人爲黃道真見搜神後記及三洞羣仙錄陳搏所館之異人劉海蟾名易見四朝聞見錄丙集亦名昭遠見續博物志李涉贈詩之盜爲韋思明見雲溪友議蕭

穎士之奴爲杜亮見朝野僉載偶憶類舉不能悉數

鄭虔有名天寶間與杜子美友善而其字不著書畫譜引畫家傳云虔字弱齊台州志作若齊未知孰是日聞之先輩云弱字譌齊當讀如齊明盛服之齊庶與名相配

凡人見有子孫之不類者非追論其祖父卽歸咎于風水似非通說曰此不可以理解也堯舜伯禹之父子無論矣劉向乃心漢室而子歆爲新莽國師盧懷慎以清節爲相子奕罵祿山死名列忠義而奕乃生杞姦邪傾國韓琦相業冠富范而有曾孫佖胄司馬溫公名德蓋世而有兒子宏之威虐見黃山谷有曾孫佖胄司馬溫公名德蓋世而有兒子宏之威虐見黃山谷呼其堂吏翁應龍爲簡齋先生豈不上玷先人乎文信國有弟璧明左中丞懋第有從弟懋秦史閣部可法有弟可程全

氣之不類又如此因亦有犧出犁胎者王莽之子宇褚淵之子資武則天之姪攸緒李義府之子湛李懷光之子璿朱溫之兄全昱秦檜曾孫鉅及二子浚澤又有女子之不係世類者漢平帝后王莽女愍帝后曹操女晉愍懷太子妃王衍女周宣帝后楊堅女宇文士及妻南陽公主隋煬長女吳太子璉妃李昇女皆抱君國之痛節義自持由是觀之性有善不善之言未可盡非也

唐宣宗自稱鄉貢進士以爲天子之所未有也外此尚有之乎曰登進士官翰林而稱帝者西遼德宗大石也以狀元而稱帝者西夏神宗遵頊也

閩人鄉音最難曉故必延師學習官話今乃逢人多以官話對答豈居楚而必齊語耶曰自昔已然故孟子言之抱朴子譏

惑篇云轉易其聲音以效北語既不能便良似可恥可笑所謂不得邯鄲之步而有匍匐之嗤者

嘗見明人集中高士賦有云足加帝腹固是狂奴手捋帝鬚猶稱老子下二句何出曰南史何點傳梁武帝與有舊徵爲侍中捋帝鬚曰乃欲臣老子北周書王軌傳軌因內宴捋高祖鬚曰可愛好老公但恨後嗣弱耳此別一事又李泌枕肅宗膝臥見杜陽雜編

有以宋人詩文用本朝故事爲問者曰昏忘不能舉告但記說部中載眞西山謝宜召入學士院表云修除翰院在環滁出守之餘軾侍禁庭亦赤壁歸來之後又文信國謝江樞密萬里砂云稱彥博於都堂幸借郇公之譽薦仲淹於館職致忘元獻之知東坡金門寺有蟬無監州詩皆用本朝故事至後

村詩用本朝事甚多

邪教最易惑愚氓其爲亂蔓延連結不能旦夕翦除大抵白蓮
天主二教傳習更多將何法以絕之曰是在平日有司嚴察
犯者必寘重典庶陰消竊發之禍至其名號幻妄亦隨時而
異陸渭南准詔條對狀言邪人處處皆有淮南謂之二禳子
兩浙謂之牟尼教江東謂之四果江西謂之金剛禪而福建
之明教尤甚白衣烏帽所在成社經像刻板流布以祭祖考
爲引鬼永絕血食以溺爲法水用以沐浴其他妖濫未易槩
舉觀此則知世變民靡古今全患也

卜之法不一書傳所紀雞骨羊骨牛蹄及虎馬之類皆可卜驗
殆亦有傳授歟曰此何足異酉陽雜俎言嶺南人有病以蝨
卜之向身爲吉背身爲凶蝨卜更奇今嶺南不聞以此卜者

又徐氏談薈云揚州蘇隱夜臥聞被下有數人念阿房宮賦聲繁而小急開被視之惟得蠹十餘其大如豆殺之卽止若隸蠹事足資談助

俗以髮禿者爲翦翦字書無此二字翟晴江通俗編作痢黎謂痢痛也疥也黎猶黎首也案痢無髮禿之說黎訓衆訓黑於義不合曰似當作髻黎玉篇髻禿也百喻經云昔有愚人頭上無毛有一人以黎打頭乃至傷破愚人默然忍受不知避去俗呼或本此歟

禮明堂位楊豆注齊人謂無髮爲禿楊音苦入反蓋楊全髻

馬班以書序爲孔子所作唐以前諸儒無異說至宋人始疑其僞讀史記本紀世家尚書篇目載十之七八所未及者僅十餘篇而殷紀有大戊篇書序獨無之何也曰百篇之序眞實不敢臆決但子長去孔子時未遠其言必有師承蓋從孔安

國問故而得之爾至大戊一篇不見於序當是脫逸朱竹垞
經義攷謂卽咸艾四篇之一蓋因殷紀連及而爲之說九其
九篇不聞異名何獨咸艾之篇別名大戊乎其爲書序所遺
可見左傳定四年有伯禽唐誥二篇書大傳有揜誥漢志引
月采引豐刑亦書序所無秦火之後各經尚多失亡書序之
闕無足怪矣

墨子所引有總德有武觀有禽艾有豎年
有去發皆類汲冢書篇目與尚書不合

前人跋韓文公淮西碑敘仆碑事末句云此與剡祖亭顏碑何
異未知所出曰江州有祖將軍廟顏魯公造祖亭製文勒碑
文與書爲天下最後典州吏修九江驛剡碑述已勞績爲九
江驛碑歐陽詹爲文弔之見唐文粹

凡台葬必先元配次及其繼不論有子無子也乃宋文鑑載穆
修徐文質墓誌銘云君四娶初室李氏無子長子孝山出次

室李氏謀葬君於先墓之次以次室李氏爲合初李氏次苗氏李氏三室皆全穴而異口斯實禮也果禮歟曰此葬之變不可謂禮

闕文疑
墳字

唐以來詩中每用紅羊事如殷堯藩詩太平從此銷兵甲記取紅羊換劫年是何故實曰嘗問之陸萊仲云任昉述異記梓樹之精化爲青羊五百年而紅天運百年中變五百年大變所謂劫也詩當本此或謂紅羊指宋南渡事恐非旣而有丸云歲在丁未曰紅羊猶以乙酉爲白雞斯說甚確殷堯藩詩題作李節度平虜蓋述文宗大和元年丁未李寰討李同捷事敬宗無道文宗初立盡革稅政是換劫也宋高宗建炎元年亦值丁未故皆有紅羊語